

Fu fato election del Proveditor a misurar li boschi, come fu preso, et rimase sier Antonio Justinian fo di Pregadi, qu. sier Francesco el cavalier, el qual vene a tante a tante con sier Filippo Trun fo savio a terra ferma, qu. sier Priamo. Et rehalotadi, cazete il Trun di una ballota. Fo tolto numero 16.

Electo Proveditor sora i boschi di trivisana et Friul.

† Sier Antonio Justinian fo di Pregadi, qu. sier Francesco el cavalier,
 Sier Filippo Trun fo savio a terra ferma, qu. sier Priamo,
 Sier Zuan Nadal Salamon fo savio a terraferma, qu. sier Tomà,
 Sier Nicolò Justinian è proveditor sora le acque, qu. sier Bernardo,
 Sier Piero Boldù savio a terraferma, qu. sier Lunardo,
 Sier Polo Valaresso fo podestà a Bergamo, qu. sier Gabriel,
 Sier Lunardo Zantani fo a la camera d'imprestidi, qu. sier Antonio,
 Sier Jacomo Antonio Orio fo a la camera d'imprestidi, qu. sier Zuane,
 Sier Carlo Contarini fo savio a terraferma, di sier Panfilo,
 Sier Marco Antonio Calbo fo a le Raxon vecchie, qu. sier Hironimo,
 Sier Lorenzo Minio fo proveditor a Peschiera, qu. sier Almorò,
 Sier Carlo Capello el Cao di XL, qu. sier Francesco el cavalier,
 Sier
 Sier
 Sier
 Sier

Da Todi, del procurator Pixani, di 6, fo lettere. Zerca danari. Ha hauto ducati 8000.

378 *Et per lettere particular di domino Alvixe Lippomano, da Orvieto, di 5, è: Come era zonto il cardinal di Mantoa fradello del Marchexe, qual vien di Mantoa. Che spagnoli et lanzinech doveano a di 11 ussir di Roma per andar verso il reame, et haveano hauto danari. Che 'l cardinal Cesarin, qual è tutto cesareo, diman si aspettava de li. Item, che monsignor di Vandemon era stato col Papa per nome del re di Franza,*

et expedito si dice *ad vota*. Che li è grandissima carestia del viver. Che domino Zuan Corner, fo de domino Zorzi procurator, qual vene per far sier Francesco suo fradello cardinal, ritorna, et zerca rimeter li danari; el qual voleva che 'l Papa fazendolo cardinal li desse la camerlengaria, et haria speso assai; ma il Papa non ha voluto, si ch'è a Todi dal procurator Pixani suo suocero.

Da Ravenna, di sier Alvixe Foscari proveditor, di 10. Come heri sera gionse qui lo illustrissimo signor Camillo Ursino partito dal nostro campo di Cassan con licentia di la Signoria nostra; et va al campo francese. Havia con se zerca 30 cavalli. *Item*, esser zonti cinque corieri del re Christianissimo venuti di Franza, parte in 6 et parte in 8 giorni, con 50 milia scudi per bisogno de l'exército; ai qual dete esso Proveditor una barca armata, et come sarà tempo si partirano.

A di 12. La matina, vene in Collegio sier Vettor Grimani procurator fo di sier Hironimo fo del Serenissimo, fradello del patriarca di Aquileia, et disse al Serenissimo in la sua camera, come heri sera zonse il brieve del Papa di la creation de ditto suo fradello Cardinal, et l'havia publicato primo di tutti; et ha publicà numero 12, di quali è fatti (*i nomi*) per avanti. Et però si alegrava col Serenissimo. Et suo fradello sier Marco el procurator, qual andò a questo effetto a Orvieto dal Papa, sarà fin 3 zorni qui.

Et nota. Ditto Cardinal è stà creato con dar al Papa ducati . . . milia; 12 milia li dete per avanti questo Mazo, el resto al presente; i qual nostri danari vien dati a spagnoli etc.

Fo sonato campanò a San Zuminian et a Santa Maria Formoxa; et andava la brigata a tochar la man al Cardinal a Santa Maria Formoxa in caxa di sier Vettor procurator, dove ditto Cardinal andoe per adesso; *tamen* stà a Muran in chà Lipomano. Et li soi parenti vestiteno di color; et la sera trombe et pifari in Procuratia, a Santa Maria Formoxa et a Muran.

Et nota. La poliza di 12 cardinali publicati sarà notada qui avanti, aziò il tutto veder si possi.

Da Cassan, di sier Tomà Moro proveditor zeneral, di 9. Come è aviso da Milan esser ussuto il conte Lodovico di Belzoioso con 1000 fanti et andato verso Monguzo, loco del castellan di Mus, per farlo retrar di l'asedio di Monza dove è al ponte. El qual castellan ha mandato a dimandar soccorso, et li è stà dato bone parole aziò non si lievi de l'impresa. *Item*, scrive come